

25/03/1998

IT, MSC landasan kemajuan, kemakmuran negara

M Azlan Jaafar

PELABURAN dalam teknologi maklumat (IT) serta projek Koridor Raya Multimedia (MSC) berupaya mengubah struktur sosioekonomi ke tahap lebih baik serta membuka pelbagai peluang baru yang menguntungkan segenap lapisan masyarakat.

Pengerusi Microsoft Corp, . Bill Gates, berkata peluang terhasil dari MSC cukup mengagumkan manakala setiap perniagaan di negara ini berpeluang untuk menjadi lebih kompetitif.

"Untuk setiap sekolah di negara ini, terdapat peluang menyediakan pendidikan lebih baik dan merealisasikan potensi pelajar muda anda.

"Untuk kerajaan, ia membuka peluang menjadi lebih cekap dan mudah diakses serta terdapat minat yang besar ditunjukkan (kerajaan) dalam melaksanakannya.

"Secara keseluruhan, peluang pekerjaan di Malaysia bakal menyediakan kerja menarik dengan gaji lumayan.

"Ia memungkinkan segenap masyarakat untuk mengambil bahagian dalam banyak perkara dari sebelumnya," kata Gates ketika menyampaikan ucapturnya "Masyarakat Rangkaian" di Kuala Lumpur, minggu lalu.

Kira-kira 3,000 orang mendengar visi Gates mengenai masa depan perkomputeran, terutama kesan Internet kepada perniagaan dan masyarakat.

Usahawan IT yang mengetuai syarikat perisian desktop terbesar di dunia, Microsoft Corp, berada di Kuala Lumpur untuk lawatan kerja ke rantau Asia Pasifik.

Gates yang juga antara 41 panel penasihat antarabangsa kepada MSC, turut mengadakan perbincangan dengan Perdana Menteri Datuk Seri Dr Mahathir, Timbalan Perdana Menteri Datuk Seri Anwar Ibrahim dan Menteri Kabinet.

Dalam lawatan keduanya ke negara ini, Gates menyokong usaha pembangunan projek MSC serta menjanjikan pelaburan maksimum dalam kawasan teknologi tinggi seluas 750 hektar di selatan Kuala Lumpur.

Microsoft Corp. sudah meningkatkan kepakarannya dengan membawa pakar tambahan serta memindahkan ibu pejabat serantaunya ke Malaysia.

Beliau turut memuji usaha pembangunan kerajaan elektronik (EG), perdagangan elektronik (EC) dan sekolah bestari. Individu terkaya menurut majalah Forbes itu turut menyumbang RM1 juta dalam bentuk perisian dan perkakasan bagi program sekolah bestari.

Mengenai apa yang perlu dilakukan dalam menjadikan Malaysia peneraju IT peringkat antarabangsa, Gates berkata empat komponen penting harus diberi penekanan, iaitu:

Pelaburan dalam sistem pendidikan dengan memastikan siswazah tahu menggunakan Internet serta infrastruktur yang diperlukan.

Menurut Gates, undang-undang amat penting bagi melindungi hakcipta perisian kerana firma tempatan akan membangunkan lebih banyak perisian dan mendapat perolehan daripada pengguna yang menggunakan perisian itu.

Beliau turut memuji pemimpin Malaysia yang menurutnya negara ini mempunyai pemimpin yang memangkinkan pembangunan IT.

"Kerajaan Malaysia mencakupi perubahan dan teknologi serta memahami daya saing Malaysia pada masa depan bergantung pada penggunaan IT," katanya.

(END)